

Izzati 'gila' kumpul cenderamata

Atlet olahraga simpan 'keychain' pin dalam kotak khas

Oleh Mohd Khairie Khalid
khairie@bh.com.my

Serdang: Sudah tentu ramai di antara kita suka mengumpul cenderamata apabila melancong ke mana-mana destinasi sebagai kenangan dan tanda ingatan ke destinasi berkenaan.

Hobi itu juga dikongsi atlet olahraga negara, Saidatul Izatti Suhaimi yang sering membeli cenderamata apabila berkunjung ke mana-mana negara atau menyertai kejohanan peringkat tempatan mahupun antarabangsa.

Izzati yang pernah mewakili negara dalam sukan olahraga di temasya Sukan SEA Kuala Lumpur 2017 (KL2017) menyifatkan, minat itu sebenarnya sudah sebat dengan dirinya sejak zaman kanak-kanak lagi.

Sehingga kini, penuntut Universiti Putra Malaysia (UPM) itu sudah memiliki lebih 100 koleksi malah mempunyai kotak yang dikhaskan untuk menyimpan barang cenderamata berkenaan.

"Dulu sewaktu kecil saya suka kumpulkan 'sticker' kartun... siap buat dua tiga album.

"Kemudian minat itu berubah dan saya berminat mengumpulkan barang cenderamata seperti 'keychain' ataupun pin. Sekarang sudah ada lebih 100 koleksi yang disimpan di rumah," kata Izzati, atlet acara 400 meter (m) lari berpagar.

"Koleksi yang saya paling sayang adalah dari Taiwan kerana itulah kali pertama saya menyertai kejohanan yang agak besar iaitu Kejohanan Olahraga Remaja Asia pada 2014, katanya."

Selain minat mengumpulkan cenderamata, Izzati mengakui gemar melancong, malah akan mencari peluang sendiri untuk merantau jika tidak berkesempatan mewakili negara menyertai kejohanan di peringkat antarabangsa.

"Saya pernah berkunjung ke Singapura, Indonesia, Myanmar,

Vietnam, Taiwan, Australia, Filipina dan Thailand, semuanya kerana menyertai sukan, cuma dua tiga negara saja pergi sendiri.

"Memang minat melancong cuma kekangan masa yang jadi penghalang. Saya pernah ke Singapura tiga hari seorang diri, Alhamdulillah semuanya berjalan lancar," cerita Izzati yang pernah mengambil aliran Arab dari sekolah rendah sehingga berusia 15 tahun.

Izzati yang dibesarkan di Sungai, Perak dan mula diserapkan ke skuad kebangsaan pada usia 15 tahun berkata, selain mengumpulkan cenderamata dan melancong, dia juga suka membaca buku falsafah.

Sifatnya yang ingin tahu menyebabkan Saidatul akan menyiasat perkara sebenar sehinggalah dapat mengetahui apa yang terjadi.

"Saya juga suka makan, malah kebanyakan tempat yang tular saya akan pergi," kata Izzati yang gemar akan makanan kampung dan sambal petai ketika ditemui BH Sukan di UPM, baru-baru ini.



Saya berminat mengumpulkan barang cenderamata seperti 'keychain' ataupun pin. Sekarang sudah ada lebih 100 koleksi yang disimpan di rumah.

Saidatul Izatti,
Atlet olahraga



Saidatul Izatti Suhaimi

- » Umur: 23 tahun
- » Tarikh lahir: 11 Ogos 1996
- » Tempat lahir: Hospital Besar Ipoh
- » Asal: Ipoh, Perak
- » Adik beradik: Sulung daripada 4 adik beradik
- » Nama ibu: Aziezun Othman
- » Nama ayah: Suhaimi Awang Kechik
- » Berat: 52.5kg
- » Tinggi: 1.68cm
- » Hobi: membaca (buku falsafah), menonton dokumentari
- » Makanan kegemaran: sambal sotong, mi kari
- » Pendidikan:
- » Sekolah rendah: SK Besout 3, Perak
- » Sekolah menengah: SMK Felda Besout / SMK Kg Pasir Puteh
- » Universiti: UPM
- » Sukan-Acara: 400 Meter Lari Berpagar
- » Pencapaian: .SUKMA PERLIS 2014 pingat emas (400m berpagar), perak (4x100m & 4x400m).Kejohanan Sukan Sekolah Asean, Manila, Filipina 2014, gings (400m lari berpagar) perak (4x400m)
- » Kejohanan Sukan Universiti Asean Palembang 2014, gings (4x400m)
- » Terbuka Malaysia 2016, emas (400m lari berpagar)
- » Terbuka Malaysia 2017, gings (400m lari berpagar)
- » Sukan SEA Kuala Lumpur 2017, tempat ketujuh (400m lari berpagar).Terbuka Malaysia 2018, gings (400m lari berpagar)